

Part 6: Stàtica

La composition dle fòrse e dij moment, soa risultant e le condission d'echilibri a ven-o viste prima an manera astrata e peui pér ij còrp reaj. Vincoj e reassion vincolar e quaicòs dij Travaj Virtuaj. Èl prinsipi 'd d'Alembert. Arpijoma an part lòn che i l'oma già vist ant la part antrodutiva.

TAULA DLA PART CH'A FA SES

Èl but dla Stàtica.....	163
Echilibri d'un pont material	165
Pont material lìber	165
Pont material vincolà	165
Pont vincolà a nen passé na surfassa (con atrito)	165
Reassion dël vincol sensa atrito	166
Echilibri d'un pont vincolà a sté an s'na linea	167
Echilibri stabil, instabil, indiferent	169
La composition dle Fòrse e dij Moment.....	171
Fòrse aplicà a un pont	171
Fòrse complanar con pont d'aplicassion divers.....	172
Fòrse concorrente	172
Fòrse paralele concòrde	173
Fòrse paralele dëscorde.....	175
La cobia èd fòrse	177
Se le fòrse a son pì che doe	177
Fòrse con righe d'assion nen complanar.....	178
Traslassion paralela èd na fòrsa	178
Composission èd doe fòrse qualunque.....	179
L'echilibri dij sistema rèid e dij còrp	181
Equassion cardinaj dl'echilibri.....	181
Echilibri dij còrp vincolà.....	182
Còrp vincolà a un pont.....	182
Còrp vincola a viré antorna a n'ass	182
Còrp pogìa.....	183
Echilibri ant un sistema nen rèid – Fòrse elàstiche interne	185
Ij travaj Virtuaj e 'l Prinsipi 'd d'Alembert.....	191
Gré 'd libertà e vincoj	191
Ij travaj virtuaj.....	191
Èl prinsipi 'd d'Alembert	193

TAULA DLE FIGURE DLA PART CH'A FA SET

Figura 1 – Echilibri d'un pont an s'na surfassa con atrito.....	166
Figura 2 – Pont vincolà a na linea.....	167
Figura 3 – Echilibrid'un pont an s'na linea	168
Figura 4 – Echilibri an s'na linea sensa atrito	169
Figura 5 – Echilibri stabil, instabil, indiferent	170
Figura 6 – Fòrse aplicà a l'istess pont relativ e moment	171
Figura 7 – Composission dij moment	172
Figura 8 – Composission èd fòrse concorrente	173
Figura 9 – Composission èd fòrse paralele concorde.....	174
Figura 10 – Pont d'aplicassion d'R (fòrse paralele concorde)	175
Figura 11 – Composission èd fòrse paralele discorde.....	176
Figura 12 – Pont d'aplicassion d'R (forse paralele dëscòrde)	176
Figura 13 – Poligon funicular.....	178
Figura 14 – Efet dla traslassion paralela èd na fòrsa.....	178
Figura 15 – Composission èd doe fòrse qualunque	180
Figura 16 – Echilibri d'un còrp vincolà a n'ass.....	182
Figura 17 – Perìmeter d'apògg	183
Figura 18 – Echilibri con atrito.....	184
Figura 19 – Echilibri d'un sistema nen rèid	185
Figura 20 – Echilibri d'un sistema nen rèid	186

EL BUT DLA STÀTICA

La Stàtica a studia le condission pér l'echilibri dij còrp che a son sogét a fòrse. I l'oma vist che un còrp a l'é ferm mach cand tute le fòrse che a agisso a l'han n'arzultant zero e che l'istessa còsa a càpita ai moment dë ste fòrse.

Antlora a l'é but èd la Stàtica verifiché se un sistema èd fòrse a l'é an echilibri e, cand sòn a l'é nen verificà, trové fòrse e moment echilibrant pér él sistema dait.

Dal moment che a ven-o sercà le condission che a fan an manera che 'l sistema rèid a staga fèrm, a l'ha nen amportansa se él sistema cartesian èd riferiment a produv fòrse complementar, tipo le fòrse èd Coriolis, pérchè coste as manifesto mach con na velocità. Un sistema d'arferiment terestr a va donc bin sensa che a sia aprossimà.

Në studi semplificà dla Stàtica a ten mach cont dle geometrie, dle fòrse aplicà e dle reaccion vincolar. Në studi pì complét e pì pràticich a venta èdcò che a ten-a cont dle deformassion elàstiche e dle reaccion corispondente, e dla resistensa dij materiaj.

Le fòrse d'atrito al prim dëstach a son èdcò na component amportanta dle fòrse che a garantisso l'echilibri. Se un sistema a l'ha nen da manca ed coste fòrse pér esse stabil, antlora l'echilibri che a l'ha as peul dì **stàbil**. Se anvece un sistema a stà ferm mersì a coste fòrse, antlora l'echilibri a ven ciamà **làbil**. Na qualonque ramassa pogia a 'n mur a stà sù mersì a l'atrito e donca al'é an echilibri làbil.

Pér l'echilibri, l'atrito a l'è na fòrsa bin amportanta. A basta pensé che un ciò ò na vis a fan so mesté mersì a l'atrito.

I vèddroma peui che 'l concét d'echilibri a peul esse estèis a còrp e sistema an moviment, con n'estension dël concét èd fòrsa. Cost a l'é 'l prinsipi èd d'Alembert, che oltra a esse amportant pér la stàtica, i vèddroma che a buta 'dcò le base pér na formulassion analìtica dla dinàmica che a l'é motobin pì potenta 'd cola vетorial ch'i l'oma vist fin-a sì.

Sòn però a vnirà dòp. Adéss i comensoma a vèdde la Stàtica clàssica.

Pàgina lassà bianca èd propòsit

ECHILIBRI D'UN PONT MATERIAL

Ancaminoma a vëdde le condission d'echilibri, an general, pér un pont material. Ste considerassion a servò coma base pér l'estudi èd sistema reaj.

Pont material lìber

Un pont lìber, pér esse an echilibri, a ciama che a sia zero l'arzultant èd tute le fòrse che a agisso an sël pont. Se èl pont a l'ha na massa e as treuva ant un camp gravitassional che a l'ha un potensial U , antlora, ant un sistema èd riferiment cartesian, a venta che a sio sodisfaite le condission:

$$\frac{\partial U}{\partial x} = 0 \quad ; \quad \frac{\partial U}{\partial y} = 0 \quad ; \quad \frac{\partial U}{\partial z} = 0$$

Sòn a corispond a ciámé che le component dle fòrse arlong ij tre ass coordinà a sio zero. Ma le stesse condission a son èdcò cole che a diso che ant èl pont considerà la fonsion $U(x, y, z)$ a l'ha un minim ò un massim.

Se pijoma com arferiment èl camp gravitassional terestr¹, ant lë spassi èd nòstra esperienza, i podoma dì che se l'ùnica fòrsa che a agiss a l'é cola dël camp, l'echilibri a-i é nen. Se aneve an sël pont a agisso èdcò d'autre fòrse a venta che coste a compenso con precision la fòrsa pèis che a riva dal camp gravitassional.

Pont material vincolà

Se aneve èl pont a l'é vincolà, antlora i podoma vëdde se ste condission a peulo esse verificà. An efét, an tuti ij pont andova as peul trové nòstr pont material a-i é na fòrsa èd reaccion vincolar, che as adission-a a le fòrse dël camp.

I consideroma un pont vincolà a nen traversé na surfassa qualonque e un pont vincolà a sté an s'na llinia qualonque². I tnima present la definission d'atrito e d'atrito al prim d'estach che i l'oma dàit ant la part antrodutiva.

Acordoma che èl coeficent d'atrito f a l'é èl rapòrt fra èl pèis \mathbf{P} dël còrp e la fòrsa orisontal èd trassion \mathbf{T} che a-i và pér bogelo su un pian orisontal. Sto coeficent a stabiliss la duvertura α dël "còno d'atrito" e a dipénd mach dal tipo dle surfasse afacià. An efét la trassion límit T_{lim} a l'é proporsional al pèis dël còrp, e donca 'l rapòrt fra trassion e reaccion normal dla surfassa a dipend nen dla pèis.

Pont vincolà a nen passé na surfassa (con atrito)

Consideroma un pont P pogìa an s'na surfassa. Se an sël pont a agiss na fòrsa total \mathbf{F} , che a comprend èdcò sò pèis, pér nen che èl pont as bogia a venta prima èd tut che la fòrsa a sia direta vers la surfassa e nen da l'àutra part. A sta mira la fòrsa a peul esse scomponùa ant la component normal a la surfassa an col pont e la component tangent a la surfassa. A l'é natural che parlé d'atrito pér un pont teòrich a l'è n'astrassion, che però a resta bastansa intuitiva.

¹ Sensa da manca èd preciselo sempe, i consideroma un camp vertical vers èl bass, che i consideroma èl vers negativ dl'ass z èd nòstr riferiment cartesian.

² As dovria èdcò consideré un pont vincolà a sté an s'na surfassa, ma coma cas pràtic a l'ha nen vaire amportansa. Èd sòlit, peui, a peul esse apòrtà al cas èd pont vincolà a sté an s'na linea.

An figura 1 i l'oma representà la trassa $\sigma\sigma$ èd na surfassa pian-a anclinà, la fòrsa ativa \mathbf{F} total che a agiss an sël pont e soa scomposission an component. La fòrsa total, an figura, a l'é nen vertical përchè i suponoma che a-i sia èdcò d'autre fòrse externe aplicà, an manera èd traté sto cas un pôch pì an general.




Figura 1 – Echilibri d'un pont an s'na surfassa con atrito

An figura l'àngol α (che a l'ha sò simetriche rispét a la normal) a l'ha coma tangent èl rapòrt limit f , mentre l'àngol β a l'ha coma tangent èl rapòrt tra la component dla fòrsa normal a la surfassa N e la component T che a tira a fé sghijé èl pont.

Se $\beta \leq \alpha$, la component T a l'é pì cità dla fòrsa limit èd trassion che a-i và pér fé ancaminé èl moviment e èl pont a l'é an echilibri. Ma i l'oma dit che l'adission total dle fòrse che a agisso an sël pont a venta che a sia zero pér podèj avèj l'echilibri. Son a veul dì che la reaccion dèl vincol R a venta che a sia ugual e contraria a la fòrsa total ativa \mathbf{F} .

An efét la reaccion a peul esse modelà coma an figura. Na component R_n as opon a la component N dla fòrsa \mathbf{F} e costa a l'é la reaccion dèl vincol sensa atrito. Na component R_t a l'é anvece originà da l'atrato e as opon a la trassion T . Donca le còse a van coma se l'atrato a anclinèissa la reaccion pér compensé la trassion. Sòn a val fin-a a cand fòrsa e reaccion a stan andrinta al còno d'atrato, èd duvertura α .

Reaccion dèl vincol sensa atrito

Se la surfassa a l'ha nen atrito, antlora soa reaccion a l'ha nen component tangensiaj e as èsvilupa mach an diression normal a la surfassa. Pér l'echilibri a venta che a sia $\mathbf{F} = -\mathbf{R}$ e donca èdcò la fòrsa total a venta che a sia normal a la surfassa.

Suponoma che la surfassa a l'abia equassion $f(x, y, z) = 0$. As dimostra (e sì i lo foma nen), che la normal a la surfassa ant un pont $P(x, y, z)$ a l'ha ij cossen diretor rispetivament proporsionaj a le derivà parsiaj $\partial f / \partial x; \partial f / \partial y; \partial f / \partial z$.

Sensa gionté d'autr disoma che èl **gradient** dla fonsion $f(x, y, z)$ a l'é èl vetor che a l'ha l'espression, adission dle derivà parsiaj (vèdde la part an sij vetor):

$$\text{grad } f = \frac{\partial f}{\partial x} \cdot \vec{i} + \frac{\partial f}{\partial y} \cdot \vec{j} + \frac{\partial f}{\partial z} \cdot \vec{k}$$

Se antlora i consideroma na costant èd proporsionalità λ , i podoma scrive che la reaccion, che sensa atrito i l'oma vist che a l'é sempe normal a la surfassa, a val:

$$\vec{R} = \lambda \cdot \text{grad } f \quad \text{e pér l'echilibri} \quad \vec{F} + \lambda \cdot \text{grad } f = 0$$

Se F_x, F_y, F_z a son le component dla fòrsa total as peulo scrive le corispondente tre eqassion scalar (equassion relative a le tre component):

$$F_x + \lambda \cdot \frac{\partial f}{\partial x} = 0 \quad ; \quad F_y + \lambda \cdot \frac{\partial f}{\partial y} = 0 \quad ; \quad F_z + \lambda \cdot \frac{\partial f}{\partial z} = 0$$

Se a son conossùe la fòrse an fonsion dla posission, coste equassion e cola èd la surfassa a pérmetto èd trové ël ò ij pont d'echilibri e la reassion \mathbf{R} an costi pont.

Pont vincolà a sté an sla surfassa (sensa atrito)

Se 'l pont P a l'é vincolà a sté an sla surfassa (e donca a peul nen lassé la surfassa da gnun-a dle doe part), i podoma semplifiché le còse. An efét, i podoma pensé a doi parameter q_1 e q_2 definì coma coordinà curvilinie an sla surfassa che a pèrmëtto 'd definì la posission dël pont P an sla surfassa, e donca a sarà $P = P(q_1, q_2)$. Pér avèj l'echilibri a basta che la fòrsa arzultanta \mathbf{F} a sia normal a la surfassa, e donca normal ai doi vетor $\frac{\partial P}{\partial q_1}$ e $\frac{\partial P}{\partial q_2}$, che a son tangent a la surfassa. Se donca i ciamoma Q_1 e Q_2 le component dla fòrsa \mathbf{F} second le linie coordinà che a passo da P an sla surfassa, a venta che coste a sio zero. Vis-a-dì:

$$Q_1 = F \times \frac{\partial P}{\partial q_1} = F_x \frac{\partial x}{\partial q_1} + F_y \frac{\partial y}{\partial q_1} + F_z \frac{\partial z}{\partial q_1} = 0$$

$$Q_2 = F \times \frac{\partial P}{\partial q_2} = F_x \frac{\partial x}{\partial q_2} + F_y \frac{\partial y}{\partial q_2} + F_z \frac{\partial z}{\partial q_2} = 0$$

Da coste as peulo trové le coordinà q_1 e q_2 dle posission d'echilibri. Se peui l'espression difernsial $Q_1 dq_1 + Q_2 dq_2 = \vec{F} \times dP$ a l'é difernsial precis èd na fonsion $U(q_1, q_2)$, antlora i l'avroma che $Q_1 = \frac{\partial U}{\partial q_1}$ e $Q_2 = \frac{\partial U}{\partial q_2}$ e parèj ij pont d'echilibrí a arzultó esse ij pont èd màssim ò mìnim dla fonsion potensial U .

Echilibri d'un pont vincolà a sté an s'na lìnia

Suponoma che ël pont P , andova a peulo agì 'd fòrse, a sia vincolà a sté an s'na lìnia qualonque. Is arferima a figura 2.




Figura 2 – Pont vincolà a na lìnia

Se i podoma pensé che la linea e él pont a l'abio un dait coeficent f d'atrito ressiproch, i podoma fé éd considerassion dël tipo éd prima.

Ant l'ëspassi la fòrsa arzultant aplicà al pont (comprès él pèis), a peul avèj na diression qualonque. Noi i la scomponoma ant la component tangent a la lìnia (diression che él pont a peul bogesje), e l'àutra component a arzulta ant él pian dla fòrsa e dla component tangent, normal a la lìnia an col pont.

Se tra le anfinìe surfasse che a passo pér la linea i sernoma cola che a l'ha ant él pont P la normal ant la stessa diression dla normal N dla fòrsa, pér costa surfassa él problema a l'é col che i l'oma già vist. Rispét a sta surfassa, la lìnia a podrà gionté ma nen gavé éd vincoj.

Sto déscors a peul esse fait pér ògni diression dla fòrsa. Se lòn che i podoma consideré él coeficent d'atrito a l'é l'istess pér tute le diression, tnisend cont che pér ògni diression dla fòrsa a-i sarà na surfassa ant le condission che i l'oma vist, as peul conclude che a-i é l'echilibri se la fòrsa total \mathbf{F} a stà fòra da un còno con l'ass tangent a la lìnia an col pont e con na duvertura α tala che soa tangent a sia $1/f$. Atension che cost a l'è nen él còno d'atrito vist prima.

La figura 3 a mostra lòn che i l'oma dit. A venta notè che sto còno a ven definì an manera contraria al còno d'atrito che i l'avio definì prima.

Se anvece i suponoma che la linea a l'èbia nen atrito, pér l'echilibri a l'é necessari che la component tangensial \mathbf{T} dla fòrsa a sia zero, pérchè gnun-a reassion d'atrito a podrà compenséla.

La fòrsa total aplicà \mathbf{F} a venta donca che a sia normal a la linea, vist che la reassion vincolar a peul mach esse normal.




Figura 3 – Echilibri d'un pont an s'na linea

Na lìnia ant l'ëspassi a peul esse arpresentà an manera analítica da l'intersession éd doe surfasse $f(x, y, z) = 0$ e $g(x, y, z) = 0$. An figura 4 arportoma an manera sempia doi pian π e σ che a definisso na riga drita \mathbf{r} . An sla riga a-i é un pont P vincolà a sté an sla midema, con na fòrsa total \mathbf{F} aplicà.

Arpabajand lòn che i l'oma vist pér na surfassa, i indicoma con λ e μ doi coeficent éd proporsionalità e i suponoma dë scompon-e la reassion \mathbf{R} ant le diression normaj ai doi pian. I podoma scrive:




Figura 4 – Echilibri an s'na linea sensa atrito

$$\vec{R} = \lambda \cdot \text{grad } f + \mu \cdot \text{grad } g$$

e pér l'echilibri :

$$\vec{F} + \lambda \cdot \text{grad } f + \mu \cdot \text{grad } g = 0$$

vis - a - dì :

$$F_x + \lambda \cdot \frac{\partial f}{\partial x} + \mu \cdot \frac{\partial g}{\partial x} = 0 \quad ; \quad F_y + \lambda \cdot \frac{\partial f}{\partial y} + \mu \cdot \frac{\partial g}{\partial y} = 0 \quad ; \quad F_z + \lambda \cdot \frac{\partial f}{\partial z} + \mu \cdot \frac{\partial g}{\partial z} = 0$$

Coste equassion, pì le doe equassion dle surfasse a përmëtto èd trové x , y , z , λ , μ andova a esisto le condission d'echilibri.

Echilibri stabil, instabil, indiferent

An general a ven ciamà **stabil** un pont d'echilibri tal che se èl pont ò èl sistema èd pont a ven spostà a na distansa infinitésima, che a sia compatibil con ij vincoj, la fòrsa total che a agiss a tira a apporté èl pont ò èl sistema ant la posission èd partensa.

A ven anvece ciamà **instabil** un pont d'echilibri tal che se èl pont ò èl sistema èd pont a ven spostà a na distansa infinitésima, che a sia compatibil con ij vincoj, la fòrsa total che a agiss a tira a slontané èd pì èl pont ò èl sistema da la posission èd partensa.

An fin a l'é **indiferent** un pont d'echilibri tal che n'ëspostament infinitésim, che a sia compatibil con ij vincoj, a pòrta èl pont ò èl sistema ant na posission che a l'é ancora d'echilibri. Is arferima a figura 5, andova i suponoma che la fòrsa total a sia dàita mach dal pèis del pont, che a agiss an diression vertical vers èl bass.

Èl prim cas a mostra l'echilibri stabil dël pont P vincolà a sté an sla linea r . Se èl pont a ven portà an P' , la fòrsa aplicà F a tira a apporté èl pont an posission P fasend un travaj positiv dàit dal prodòt scalar $T = \vec{F} \times (P - P')$. Se èl pont a fissa an s'na surfassa, a sario possibij un nùmer anfinì d'ëspostament divers. L'echilibri a sarà stabil se pér tuti j'ëspostament possibij la condission èd prima a fissa verificà (situassion èd minim dël potensial). Se èdcò mach pér n'ëspostament la condission a l'é nen verificà, l'echilibri a l'é nen stabil.




Figura 5 – Echilibri stabil, instabil, indiferent

Ant l'ëscond cas la posission P a l'ë ancora na posission d'ëchilibri, ma se ël pont a ven spostà an P' , ël travaj dla fòrsa, portand ël pont an P a dventa negativ, pérchè la fòrsa a tirerà a slontané ël pont ëd pì (situassion ëd massim dël potensial).

Ant ël ters cas l'espostament a l'ë normal a la fòrsa e donca ël travaj a l'ë zero (ël pont a l'ë an s'na surfassa echipotensial).

An general i podoma dì che, ant un sistema 'd pont P solecità da fòrse \mathbf{F} a-i é echilibri stàbil se pér qualonque spostament infinitésim dij pont, che a sia compatibil con ij vìncoj, fin-a a posission P' , ël travaj total T che a ven fait da le fòrse : $T = \sum \vec{F} \times (P - P')$ a l'ë positiv.

LA COMPOSISSION DLE FÒRSE E DIJ MOMENT

Prima èd continué con le condission d'echilibri dij sistema èd fòrse e dij còrp materiaj, vèddoma coma as compon-o le fòrse d'un sistema rèid e ij moment dë ste fòrse rispét a un pont qualunque. Sì pér sistema rèid i pensoma a un sistema èd fòrse dont ij pont d'aplicassion a son an posission fisso tra 'd lor, mòdul, diressiun e vers a cambio nen. I l'oma già vist che le fòrse interne che ij pont as aplíco l'un con l'àutr a l'han arzultant zero, e donc a son nen considerà.

Forse aplicà a un pont

El cas èd doe ò pì fòrse aplicà a l'istess pont a l'é arpresentà an figura 6. Ant èsto cas la fòrsa arzultant a l'é nen d'àutr che l'adission vетorial de fòrse, che a l'é aplicà sempe a l'istess pont.




Figura 6 – Fòrse aplicà a l'istess pont relativ e moment

An figura a ven èdcò mostrà coma l'adission de fòrse a peussa esse fàita pér component cand i soma ant un sistema cartesian d'arferiment (la figura a evidensia mach la component **z**, pér motiv grafich).

$$\vec{R} = \vec{F}_1 + \vec{F}_2 = (F_{1x} + F_{2x}) \cdot \vec{i} + (F_{1y} + F_{2y}) \cdot \vec{j} + (F_{1z} + F_{2z}) \cdot \vec{k}$$

An figura 7 a ven mostrà che èl moment dl'arzultant **R** èd doe ò pì fòrse rispét a un pont a l'é l'adission dij moment de fòrse rispét a l'istess pont. Sòn i l'oma già vistlo parland èd vetor (Moment arzultant d'un sistema èd vetor).

Sòn a veul èdcò dì che 'l moment èd na fòrse a l'é ugual a l'adission dij moment èd soe component. Beleché a-i na sarìa nen da manca, sì i doma na cita dëmostrassion èd sòn. Vardand la sonda part èd figura 7, i l'oma na fòrse **F** con soe component F_x e F_y . La fòrse a fà n'àngol α con l'ass x . Vardoma ij moment rispét al pont P .

Rispét a sto pont, an figura a son apòrtà ij brass dla fòrse e èd soe component. Dal pont A , intersession dël brass dla component F_x con l'ass x , i trassoma la paralela al brass b dla fòrse, che a ancontra la riga d'assion dal fòrse ant èl pont B . Dal pont A i foma ècò passé la paralela t a la fòrse **F**. Ij pont H e K a son, ant l'ordin, l'intersession dël brass dla fòrse con l'ass x e l'intersession dël brass dla fòrse con la riga t .




Figura 7 – Composission dij moment

I podoma scrive:

$$\begin{aligned}\vec{M}_x &= \vec{F}_x \cdot b_x \quad ; \quad \vec{M}_y = \vec{F}_y \cdot b_y \quad ; \quad \vec{F}_x = \vec{F} \cdot \cos(\alpha) \quad ; \quad \vec{F}_y = \vec{F} \cdot \sin(\alpha) \\ \vec{M}_{tot} &= \vec{M}_1 + \vec{M}_2 = \vec{F} \cdot [b_x \cdot \cos(\alpha) + b_y \cdot \sin(\alpha)]\end{aligned}$$

Notoma che ij triangoj OQS , OHC , PHA , PAK a son tutti simij. I l'oma:

$$\begin{aligned}b &= CP \quad ; \quad BA = CK \quad ; \quad b_y = OA \quad ; \quad b = CK + KP \\ \text{ma } CK &= BA = b_y \cdot \sin(\alpha) \quad \text{e } KP = b_x \cdot \cos(\alpha) \quad \text{antlora:} \\ b &= b_x \cdot \cos(\alpha) + b_y \cdot \sin(\alpha) \quad \text{e donca } \vec{M}_{tot} = \vec{F} \cdot b\end{aligned}$$

Fòrse complanar con pont d'aplicassion different

I comensoma a consideré doe fòrse complanar aplicà a doi pont different. A-i son doi cas pér coste fòrse: ò soe righe d'assion a son concorrente ant un pont opura a son paralele. Al contrari, se le righe d'assion èd doe fòrse a son concorrente ant un pont dl'èspassi opura a son paralele, antlora a-i é un pian che a conten le fòrse che donca a son complanar.

I pijoma coma un prinsipi che se a un sistema èd fòrse i giontoma ò gavoma n'àutr sistema èd fòrse che a l'abia n'arzultant zero e moment zero rispét a qualunque pont, él sistema final a resta echivalent a col èd partensa. Sta còsa a l'è bastansa intuitiva.

Disoma peui che l'efet èd na fòrsa an s'un sistema as mantén echivalent se la fòrsa a ven fàita score longh soa riga d'assion. Sòn a l'è sens'àutr vera pér él moment èd la fòrsa rispét a un pont, pérchè lòn che a conta a l'è, oltra che él mòdul dla fòrsa, la distansa dèl pont da la riga d'assion, e né l'un né l'àutr a cambio. Pér esse pì precis disoma che fé score na fòrsa longh soa riga d'assion a cambia nen la riga d'assion dl'arzultant dèl sistema, mentre él pont d'aplicassion dl'arzultant a dipend èdcò dal pont d'aplicassion dle fòrse èd partensa. Sovens ant la stàtica lòn che a conta a l'è conosse intensità e riga d'assion dl'arzultant, pì che so pont d'aplicassion.

Fòrse concorrente

Vardoma figura 8, andova doe fòrse F_1 e F_2 a son aplicà, ant l'órdin, ai pont P_1 e P_2 . Soe righe d'assion a sio, ant l'órdin, r_1 e r_2 , che as ancontro ant él pont O .

Fasend score le fòrse an soe righe d'assion e portandje con él pont d'aplicassion ant O , i tornoma al cas èd prima e i podoma trové l'arzultant $\vec{R} = \vec{F}_1 + \vec{F}_2$ e soa riga d'assion r_r . An figura l'arzultant trovà a l'é stàita disegnà spostà da soa riga d'assion pér butéla an evidensa (donca mach motiv gràfich). Pér trové él pont d'aplicassion dl'arzultant, i podoma pensé che cost a staga an sla riga drita che a uniss P_1 e P_2 . As treuva donca a la crosiera dësta riga con la riga d'assion r_r .




Figura 8 – Composission èd fòrse concorrente

Rispét a un pont qualunque Q èl moment total dël sistema a sarà l'adission dij moment deo fòrse $\vec{M}_{tot} = \vec{M}_1 + \vec{M}_2 = \vec{F}_1 \cdot b_1 + \vec{F}_2 \cdot b_2$ che, coma i l'oma vist, a echival al moment dl'arzultant R rispét a l'istess pont. $\vec{M}_{tot} = \vec{M}_R = \vec{R} \cdot b_r$.

An efét né èl moment de fòrse né èl moment dl'arzultant a cambio se fòrse ò arzultant a scorò long la riga d'assion. I arcordoma che èl moment, scrit coma i l'oma scrivùlo, a l'é positiv se fòrса e brass a indicò na rotassion an sens orari.

A l'é evident che èl moment total dël sistema a val zero rispét a tuti ij pont che as treuva an sla riga d'assion dl'arzultant.

Pér adess i consideroma ancora duverta la question dël pont d'aplicassion dla risultant, che i l'oma definì mach second bon sens.

Fòrse paralele concòrde

L'àutr cas èd fòrse complanar a l'é col èd fòrse paralele. Comensoma a vèdde èl cas èd fòrse che a l'han nen mach l'istessa diression ma èdcò l'istess vers.

I separoma ij cas pér semplifiché la tratassion, e pérchè èl cas èd fòrse dëscòrde a pòrta a na sitoassion anteressanta che a ven evidensià a part. L'arferiment a l'é figura 9.

Dàite doe fòrse paralele concòrde F_1 e F_2 aplicà ant ij pont P_1 e P_2 , pér trové-ne l'arzultant as peul airporté èl problema a col dël cas èd prima, giusta adissionand doe fòrse èd còmod arbitrarie, ma uguaj e contrarie K e $-K$ e con l'istessa riga d'assion, coma a l'é mostrà an figura.

An costa manera né l'arzultant né èl moment arzultant a cambio, e as oten-o doe fòrse Φ_1 e Φ_2 concorrente ant un pont O . As vèdd fàcil che l'arzultant a l'é paralela a le doe fòrse, dal moment che a l'é l'adission vetorial èd doi vetor paralej.

Pèr vèdde quale che a son le distanze fra la riga d'assion dl'arzultant e colla dle fòrse i preferima vardë la part a drita dla figura. Da tut lòn che i l'oma vist fin-a sì i savoma che él moment total $\vec{M}_{tot} = \vec{M}_1 + \vec{M}_2$ rispét a un dàit pont P a l'é ugual al moment \vec{M}_R dl'arzultant R rispét a l'istess pont: $\vec{M}_{tot} = \vec{M}_R$.




Figura 9 – Composission èd fòrse paralele concòrde

I consideroma antlora él pont P , e rispét a sto pont ij brass b_1, b_2, br ant l'ordin dle fòrse F_1, F_2 e arzultant R . I consideroma peui la distansa d dle doe righe d'assion dle fòrse e le distanze d_1 e d_2 tra coste righe d'assion e la riga d'assion dl'arzultant.

$$\vec{M}_{tot} = \vec{F}_1 \cdot b_1 + \vec{F}_2 \cdot b_2 ; \quad \vec{M}_R = \vec{R} \cdot b_r$$

$$\vec{F}_1 \cdot b_1 + \vec{F}_2 \cdot b_2 = (\vec{F}_1 + \vec{F}_2) \cdot b_r$$

ma i l'oma che: $b_r = b_2 + d_2$; $b_1 = b_2 + d$ e donca:

$$(\vec{F}_1 + \vec{F}_2) \cdot (b_2 + d_2) = \vec{F}_1 \cdot (b_2 + d) + \vec{F}_2 \cdot b_2 \quad \text{che as riduv a:}$$

$$(\vec{F}_1 + \vec{F}_2) \cdot d_2 = \vec{F}_1 \cdot d \quad \text{da costa: } d_2 = d \cdot \frac{\vec{F}_1}{(\vec{F}_1 + \vec{F}_2)} = (d_1 + d_2) \cdot (\vec{F}_1 + \vec{F}_2)$$

che a veul di: $F_1 : F_2 = d_2 : d_1$

A-i é na proporsionalità inversa fra le fòrse e soe distanze da l'arzultant. Sta proporsionalità as mantén pèr le distanze dij pont d'aplicassion. An figura 10 vardoma d'arzolve la question che i l'oma lassà duverta an sël pont d'aplicassion dl'arzultant. I l'oma suponù, sensa dimostrelo, che sto pont a sia an sël segment che a anlia ij pont d'aplicassion dle fòrse. Is arferima a figura 10.

I scomponoma le doe fòrse paralele an soe component rispét a un sistema d'ass cartesian ant él pian che a jè conten tute e doe. I otnoma doi sistema èd fòrse paralele, dont un orisontal e l'autr vertical. Suponend che le fòrse a faso n'àngol α con la vertical, i l'avroma che:

$$Fx_1 = F_1 \cdot \sin(\alpha), \quad Fx_2 = F_2 \cdot \sin(\alpha), \quad Fy_1 = F_1 \cdot \cos(\alpha), \quad Fy_2 = F_2 \cdot \cos(\alpha)$$

e donca a valo le proporsion: $Fx_1 : F_1 = Fx_2 : F_2$ e $Fy_1 : F_1 = Fy_2 : F_2$

Le doe arzulant \mathbf{Rx} e \mathbf{Ry} a l'avran righe d'assion con distanse da le component che a saran proporsionalaj inverse al valor de la component coma i l'oma vist. Èl pont èd crosiera dle righe d'assion dle doe arzulant a sarà èl pont d'aplicassion dl'arzulant total dèl sistema. Sto pont as treuva an la riga drita che a passa pér ij doi pont d'aplicassion dle fòrse. An efét le distanze dij pont d'aplicassion a venta che a rëspéto le stesse proporsionalità :

$$a_1 : d_1 = a_2 : d_2 ; \quad b_1 : d_1 = b_2 : d_2$$




Figura 10 – Pont d'aplicassion d' \mathbf{R} (fòrse paralele concorde)

Fòrse paralele dëscorde

Adess consideroma èl cas andova le doe fòrse paralele a l'han vers contrari, e pér sòn is arferima a figura 11. Vëddoma d'apliché j'istessi critéri èd prima e vardoma a lòn che a pòrtò.

Prima èd tut i provoma a gionté e gavé l'istessa fòrsa (i giontoma, vis-a-dì, coma prima un sistema con arzulant zero e moment zero).

I vëddoma sùbit, an costa manera, che le fòrse che as oten-o a ven-o concorrente mach se a son differente fra èd lor le doe fòrse èd partensa. Se a son uguaj, le fòrse che as oten-o a resto paralele (e sto cas i lo vëddroma dòp). Suponoma antlora che le fòrse a sio bastansa differente da podèj fé un disegn nen trôp gròss.

As vëdd fàcil che la riga d'assion dl'arzulant a l'é sempe esterna a le doe fòrse e a stà da la part èd la fòrsa pì gròssa. L'arzulant a l'ha mòdul ugual a la diferensa dij mòduj, a l'é paralela a le fòrse e a l'ha èl vers èd la pì grossa. Vardand adess figura 12, calcoloma la posission èd sò pont d'aplicassion.

Consideroma torna èl fait che èl moment total $\vec{M}_{tot} = \vec{M}_1 + \vec{M}_2$ rispét a un dàit pont P a l'é ugual al moment M_R dl'arzulant \mathbf{R} rispét a l'istess pont: $\vec{M}_{tot} = \vec{M}_R$, fasend atension al segn dij moment.




Figura 11 – Composission èd fòrse paralele discòrde




Figura 12 – Pont d'aplicassion d' \vec{R} (fòrse paralele dèscòrde)

$$\vec{R} = \vec{F}_2 + \vec{F}_1 \quad ; \quad |\vec{R}| = |\vec{F}_1| - |\vec{F}_2| \quad \vec{R} \text{ e } \vec{F}_1 \text{ a son concòrd pérchè } |\vec{F}_1| > |\vec{F}_2|$$

$\vec{M}_1 = \vec{F}_1 \cdot b_1$ e a l'é positiv an nòstr esempi (rotassion oraria)

$\vec{M}_2 = \vec{F}_2 \cdot b_2$ e a l'é negativ an nòstr esempi (rotassion antioraria)

$$\vec{M}_R = \vec{R} \cdot b_R = \vec{F}_1 \cdot b_1 + \vec{F}_2 \cdot b_2 \quad \text{ma } b_2 = d + b_1 \quad ; \quad b_R = b_1 - x$$

$$(\vec{F}_1 - \vec{F}_2) \cdot b_R = F_1 \cdot (b_R + x) - F_2 \cdot (d + x + b_R)$$

$$\text{Svilupand e semplificand as oten } |x| = \frac{|F_2|}{(|F_1| - |F_2|)} \cdot d$$

A valo sempe le considerassion an sle component che i l'oma fàt prima, e che a pòrto a conclude che él pont d'aplicassion dla risultant a l'é alineà ai pont d'aplicassion dle fòrse.

La cobia èd fòrse

Se, a parte da la situassion èd prima, i foma chérse la fòrsa pì cità, man man che costa as avzin-a a l'àutra coma mòdul, l'arzultant a dventa sempe pì cità e sempe pì lontan da la fòrsa pì gròssa. Cand le doe fòrse a son istesse, as podrià conclude che la risultant a l'é zero e a l'é aplicà a na distansa anfinìa. Sòn, però, a l'ha nen vaire sens da la mira fisica. As peul pitòst conclude che n'arzultant vera a esist pì nen.

Se i vardoma lòn ch'a fà él moment rispèt a un pont qualonque ant le condission èd prima (fòrse diverse che a tiro a vnì uguaj) e arferendse 'ncora a la figura 12, i l'oma:

$$\vec{M}_{tot} \vec{M}_1 + \vec{M}_2 = |\vec{F}_1| \cdot b_1 - |\vec{F}_2| \cdot (b_1 + d) = |\vec{F}_1| \cdot b_1 - |\vec{F}_2| \cdot b_1 - |\vec{F}_2| \cdot d = (|\vec{F}_1| - |\vec{F}_2|) \cdot b_1 - |\vec{F}_2| \cdot d$$

Se le doe fòrse a son istesse, él valor dèl moment a dipend pì nen da la posission dèl pont d'arferiment, coma i l'oma già vist ant l'introdussion a la Stàtica.

Se le fòrse a son pì che doe

Un procediment che a l'é sempe possibil a l'é col èd procede a pass, componend doe fòrse e peui l'arzultant con la terza, e la neuva arzultant con la quarta, e via fòrt.

I notoma che él procediment dë scompon-e le fòrse an soe component e serché la riga d'assion dl'arzultant dij doi sistema èd component a peul esse aplicà an manera direta a pì che doe fòrse. An efét, dait él moment total e la fòrsa arzultant pèr ij doi sistema fàit, ant l'ordin, da le component x e y , as peul trové subit ij doi brass e donca le doe righe d'assion ortogonaj dle doe component dl'arzultant total.

A-i é èdcò un procediment grafich, che i mostroma sì sota an figura 13, che as ès-ciama “metod dèl **poligon funicular**” che a pèrmètt èd trové él valor e la riga d'assion dl'arzultant, ma nen sò pont d'aplicassion.

Dàit un sistema rèid èd fòrse, disegnà an soe posission e ant na dàita scala, coste a ven-o traslà paralele da fianch, coma a ven indicà a drita dla figura, a formé na riga rota (adission dle fòrse coma i l'oma vist), che a produv la fòrsa arzultant \mathbf{R} (ò méj, un vetor echipotent a la fòrsa arzultant), coma él lat che a sara la riga rota, da l'origin dèl prim vetor a la punta èd l'últim. La fòrsa otnùa a l'ha donca él valor (ant la scala sernùa) e la diression dl'arzultant. Componend le fòrse a venta ten-e cont èd l'ordin che a ven-o butà an sucession (èd sòlit a l'é col da snistra a drita rispèt a coma a son disegnà).

Pèr trové la riga d'assion, adess, as deuvra él procediment che indicoma sì sota:

As pija un pont arbitrari P , davsin a l'adisson che i l'oma costruì, che a sia nen alineà con l'arzultant. Da sto pont as tiro le righe drite ai pont: origin dèl prim vetor, punta dèl prim e origin dl'éscond, punta dl'éscond e origin dèl ters, e via fòrt fin-a a la punta èd l'últim.

An nòstr esempi costi a son ij segment a , b , c , d , e . Èl prim segment a l'é relativ mach a la prima fòrsa, l'éscond a prima e sonda, él ters a sonda e terza, e via fòrt fin-a a l'últim che a l'é relativ mach a l'última fòrsa.

Adess, an sèl grafich dle fòrse èd partensa, as arpòrta na paralela al segment a relativ a la prima fòrsa F_1 a ancrosié la riga d'assion dla fòrsa F_1 ant un pont qualonque Q . Da sto pont as fà passé un segment paralèl a b , che a l'é relativ a le fòrse F_1 e F_2 , e as manda a ancrosié la riga d'assion dla fòrsa F_2 , ant él pont R . As contùnia parèj fin-a a l'últim segment, relativ mach a l'última fòrsa, che ant él cas dl'esempi a l'é paralèl a e e a 'ncrosia la riga d'assion dla fòrsa F_4 ant él pont T .

Slongand la prima e l'última d'este righe (a e e ant él cas èd nòstr esempi) as oten él pont U , e da sì a passa la riga d'assion dl'arzultant, che a l'é paralela, natural, a l'arzultant trovà.




Figura 13 – Poligon funicular

Fòrse con righe d'assion nen complanar

El cas pì general a l'é col d'un sistema èd fòrse ant l'espassi, con righe d'assion che as ancrossio nen. Vist che a l'é sempe possibil compon-e le fòrse a doe a doe e che passé da doe a pì fòrse a l'é peui mach na question èd matematica, sì is limitoma a consideré el problema èd doe fòrse.

I l'oma notà prima che mòdul, riga d'assion e moment dl'arzultant a cambio nen se le fòrse a ven-o fàite score longh soa riga d'assion. Adess i vèddoma cos a suced se na fòrsa a ven idealment èspostà paralela a chila midema.

Traslassion paralela èd na fòrsa

Se i vardoma figura 14 i vèddoma bin fàcil che sposté na fòrsa an manera paralela a veul dì gionté ò gavé un moment, mentre a l'é natural che l'arzultant a cambia nen sò valor. La riga d'assion dl'arzultant as èspòsta ma as manten paralela, e sòn pérchè le component dle fòrse second j'ass d'arferiment a manten-o sò valor e donca èdcò le component dl'arzultant a manten-o so valor.

$$\bar{M}_{\text{prima}} = \vec{F} \cdot a \quad (\text{negativ})$$

$$c = a - b$$

$$\bar{M}_{\text{dòp}} = \vec{F} \cdot (a - b) = \bar{M}_{\text{prima}} - \vec{F} \cdot b$$




Figura 14 – Efet dla traslassion paralela èd na fòrsa

Ant ël cas èd figura i l'oma un moment negativ èd mòdul gròss, che con l'ëspostament a dventa un moment ancora negativ ma con mòdul cit. Donca i l'oma giontà un moment positiv, dàit da la distansa b fra la neuva e la veja riga d'assion, multiplicà pér la fòrsa spostà. Èl moment che a ven giontà al sistema èd partensa a l'é donca col dla fòrsa spostà e arferì a un pont dla veja riga d'assion. Se anvece is arferima a un pont an sla neuva riga d'assion, ël moment giontà a cambia segn.

Se, pér fé ij calcoj, i l'oma spostà “*an manera virtual*” na fòrsa, pér manten-e ël sistema echivalent a col èd partensa dovoma èdcò peui giontè un moment contrari a col che i l'oma vist.

Composission èd doe fòrse qualonque

Mòdul, diression e vers dl'arzultant \mathbf{R} èd fòrse qualonque a l'é ancora sempe l'adission vetorial dle fòrse èd partensa, che a peul esse faita pér composission geometrica ò pér component, coma i l'oma vist. Is arferima al problema general mostrà ant la figura 15, che a ilustra tuti ij passagi dël procediment.

I suponoma d'avèj doe fòrse \mathbf{F}_1 e \mathbf{F}_2 ant lë spassi, su righe d'assion r e s che as crosio nen, aplicà a doi pont èd coste righe.

I portoma la fòrsa \mathbf{F}_2 a avèj l'istess pont d'aplicassion èd \mathbf{F}_1 . Fasend sòn i foma n'ëspostament d e donca i giontoma un moment $\vec{M} = d \wedge \vec{F}_2$.

Pér manten-e ël sistema echivalent a col èd partensa a venta antlora considerè un moment contrari èd valor $\vec{M} = \vec{F}_2 \wedge d$. I trovoma l'arzultant $\mathbf{R} = \mathbf{F}_1 + \mathbf{F}_2$. St'arzultant a l'ha na posission provisòria (a l'é nen cola vera) a rason dlë spostament che i l'oma fait. I scomponoma antlora ël moment \mathbf{M} ant la diression paralela a \mathbf{R} e an cola normal.

La component \mathbf{M}_p , paralela a \mathbf{R} , che a cambia nen spostand \mathbf{R} , a l'é ël moment arzultant ver dël sistema, mentre la component normal \mathbf{M}_n , a riva dal fait che la risultant \mathbf{R} a l'é nen an soa posission vera, ma a l'é stàita spostà. Se antlora i dividoma sto moment pér \mathbf{R} i trovoma l'ëspostament s e donca la posission vera èd \mathbf{R} , che a ven antlora spostà, eliminand la component \mathbf{M}_n .

La riga d'assion dl'arzultant \mathbf{R} a ven ciamà ***ass sentral dël sistema***. Èl moment arzultant a l'é paralél a st'ass.

I l'oma donca che 'l sistema a echival a na fòrsa pì un moment che a tira a dé na rotassion an s'un pian normal a l'arzultant




Figura 15 – Composission èd doe fòrse qualonque

L'ECHILIBRI DIJ SISTEMA RÈID E DIJ CÒRP

I l'oma vist che un sistema rèid èd fòrse a peul esse echivalent a mach na fòrsa arzultanta, a mach un moment arzultant, che a dipend nen dal pont d'arferiment (com aant ël cas èd la cobia), opura a na fòrsa pì un moment (cas general). Se as ten cont èd tute le fòrse che a interven-o, vincoj comprèis, un sistema a l'é an echilibri se a son zero tant la fòrsa arzultanta quant ël moment arzultant (ò moment èd la cobia arzultanta).

As podrà pensé che se a-i é na fòrsa arzultanta, rispet a un pont qualonque a-i é èdcò un moment. A venta nen confonde ij doi concét. Ël moment dont as parla sì a l'é coma col èd na cobia, che a peul nen esse compensà giontand na fòrsa al sistema, e a l'é indipendent da qualonque pont d'arferiment.

Se un sistema a l'ha mach na fòrsa arzultanta, as peul sempe trové na fòrsa echilibranta che a anula l'arzultant e a garantiss l'echilibri.

Se un sistema a l'ha mach ël moment èd na cobia arzultant, a peul esse echilibrà mach da n'àutra cobia ugual e contrària.

Se un sistema a l'ha na fòrsa e na cobia coma arzultant, pér echilibrelo a-i và na fòrsa e na cobia.

Ant la pràtica, ël pì dle vire, l'echilibri a ven garantì da le reassion vincolar, che andrinta a dàit limit, as adato a le fòrse da echilibré. St'adatament a ven èd sòlit da fòrse elàstiche che a son provocà da cite deformassion proporsionaj a la fòrsa che a-i provoca. As riva al limit cand l'ogét che a buta ël vincol as ès-ciapa ò as èsnerva.

Equassion cardinaj dl'echilibri

Considerand un sistema rèid èd pont materiaj, i l'oma già vist che le fòrse interne as anulo l'un-a con l'àutra. Donca i pensoma coma amportante pér un sistema parèj mach le fòrse esterne (aplicà e vincolar, tnisend cont che ël pès a l'é na fòrsa aplicà).

Foma sùbit doe posission bastansa elementar:

- 1) Aplicand a un pont doe fòrse uguaj e contrarie lë stat d'echilibri dël sistema a cambia nen.
- 2) Aplicand ai pont d'un sistema n'àutr sistema èd fòrse an echilibri lë stat d'echilibri dël sistema a cambia nen.

Pér un sistema rèid, la condission necessaria e suficenta pérchè ël sistema a sia an echilibri a l'é che l'adission èd tute le fòrse aplicà ai sò pont a sia zero e che l'adission èd tuti ij moment rispèt a qualonque senter èd ridussion O a sia zero. Con le sòlite notassion:

$$\bar{R} = \sum_1^n \vec{F}_i = 0 \quad ; \quad \bar{M} = \sum_1^n (P_i - O) \wedge \vec{F}_i = 0$$

Ant un sistema d'arferiment catresian ste equassion vetoriaj as trasformo ant le ses equassion scalar:

$$\begin{aligned} \sum_1^n F_{xi} &= 0 \quad ; \quad \sum_1^n F_{yi} = 0 \quad ; \quad \sum_1^n F_{zi} = 0 \\ M_x &= \sum_1^n (y_i \cdot F_{zi} - z_i \cdot F_{yi}) \quad ; \quad M_y = \sum_1^n (z_i \cdot F_{xi} - x_i \cdot F_{zi}) \quad ; \quad M_z = \sum_1^n (x_i \cdot F_{yi} - y_i \cdot F_{xi}) \end{aligned}$$

che a son le *equassion cardinaj dl'echilibri*.

Echilibri dij còrp vincolà

El problema a ven ampostà an fonsion dël tipo èd vincol. An definitiva a venta che a sia sodisfàite le equassion dl'echilibri, che an vaire cas a peulo semplifichésse, che a ten-o cont èdcò dle reassion vincolar.

Còrp vincolà a un pont

I suponoma che un còrp a sia liber èd viré an tute le manere antorna a un pont fiss. Èd sòlit sta possibilità a l'é pì teòrica che pràtica dal moment che el pont èd vincol a venta che a sia tnù da quaicòs, che a limita pì ò manch el moviment. Noi is contentoma dla situassion teòrica.

A le fòrse totaj \mathbf{R} aplicà al còrp (a-i podrìa essje mach sò pèis) as gionta la reassion vincolar \mathbf{V} e pér l'echilibri a venta che a sia:

$$\vec{R} + \vec{V} = 0 \quad ; \quad M = 0 \quad \text{rispét a qualonque senter èd ridussion}$$

Pér ch'as verifico coste condission a l'é necessari che le doe fòrse \mathbf{R} e \mathbf{V} a sia uguaj e contrarie e che a l'abio l'istess brass rispét a qualonque pont. Sòn a veul dì che a deuvo esse alineà an sla stessa riga d'assion.

Se la fòrsa aplicà a l'é mach la fòrsa pèis, i l'avroma l'echilibri, com a l'é antuitiv, se 'l barissenter dël còrp a l'é alineà con el pont fiss an sla vertical. Se 'l barissenter a stà dzora al pont fiss l'echilibri a sarà instàbil, se a sta sota l'echilibri a sarà stàbil.

Còrp vincola a viré antorna a n'ass

Podoma serne doi pont èd l'ass coma vincoj dël tipo èd prima. Adess a-i son doe reassion vincolar \mathbf{V}_1 e \mathbf{V}_2 che a saran aplicà dai vincoj che as treuva ant ij pont O_1 e O_2 .

I suponoma na situassion coma cola ilustrà an figura 16, d'un còrp grev che a peul viré antorna a n'ass anclinà ma che a peul nen score, e i suponoma èdcò che mach un dij doi pont a buta un vincol a lë scoriment.




Figura 16 – Echilibri d'un còrp vincolà a n'ass

I scrivoma le condission pér avèj l'echilibri, pijand coma senter èd ridussion, an prinsipi, el pont fiss O_1 (el moment èd \mathbf{V}_1 a l'é donca zero rispét a sto pont) :

$$\vec{F} + \vec{V}_1 + \vec{V}_2 = 0 \quad ; \quad (O_2 - O_1) \wedge \vec{V}_2 + (G - O_1) \wedge \vec{F} = 0$$

I l'oma vist che èl moment èd na fòrsa rispèt a n'ass a l'é dàit da la proiession an sl'ass dèl moment rispet a un èd sò pont. Èl moment èd V_2 rispèt a l'ass, essend sta reaccion aplicà a l'ass midem, a l'é zero. Donca pér l'echilibri a venta che a sia zero la proiession an sl'ass dèl moment $(G - O_1) \wedge \bar{F}$ dla fòrsa pès. Sòn a càpita cand èl vetor dla fòrsa e l'ass a stan an sl'istess pian, pérchè ant èsto cas èl vetor moment rispèt al pont O_1 a l'é normal a l'ass. Èl barissenter dèl còrp as pòrta ant èl pian vertical che a passa pér l'ass.

Còrp scorèivol arlongh n'ass

Se 'l còrp a peul score sensa atrito arlongh l'ass, antlora a venta ten-e cont che le reaccion vinclar a saran sempe normaj a l'ass e donca a saran zero tant l'arzultant èd coste reaccion coma 'l moment arzultant. Se donca 'l còrp a l'é an echilibri, a venta che l'arzultant dle fòrse ative a l'àbia component second l'ass che a val zero e la component second l'ass dèl moment che a val zero.

Pér un sólid grév sòn a càpita cand l'ass a l'é orisontal, opura se a-i é n'àutra fòrsa esterna che as opon a la component dèl pès ant la diression dl'ass.

Còrp pogjà

Un còrp a peul esse pogjà su n'àutr còrp che a fà da vincol travers èd pont opura travers na surfassa. An pràctica almanch un pòch d'artito a-i é sempe, ma sovens as èstudia l'echilibri nen tnisend cont èd l'atrito.

Sensa atrito la reaccion dl'apògg a l'é sempe normal a la surfassa ant èl pont d'apògg. Con l'atrito la reaccion, coma i l'oma vist, a peul esse direta ant un-a dle diression drinta al còno d'atrito.

As definiss perìmeter d'apògg èl perimèter dèl pì cit poligon convex ch'a comprenda tuti ij pont ò le surfasse d'apògg, coma a mostra figura 17.




Figura 17 – Perìmeter d'apògg

Pér l'echilibri a son sempe le equassion cardinaj che i l'oma vist a stabilì le condission. As deriva motobin fàcil che se un còrp a l'é pogjà an s'un pian e a-i é nen atrito, pér che a peussa essie echilibri a venta che l'arzultant \mathbf{R} dle fòrse ative aplicà a sia normal al pian, dal moment che èl pian a l'é mach bon a reagì con fòrse normaj.

Ij pont d'apògg a produvo fòrse paralele e tute direte vers èl còrp. Sòn a veul dì che l'arzultant dle reaccion vinclar a sarà normal al pian e a l'avrà coma riga d'assion na riga che as treuva ant la porsion d'espacci comprèisa fra le reaccion e che a crosia, an sèl pian d'apògg, un poligon dont èl perimèter a l'é èl perimèter d'apògg.

La condission pér l'echilibri, antlora, a l'é cola che l'arzultant \mathbf{R} dle fòrse aplicà a sia nen mach normal a l'apògg, ma èdcò che soa riga d'assion a passa andrinta al perimèter d'apògg.

Se le fòrse aplicà a son mach dàite dai pès, soa arzultant a l'é aplicà al barisenter. Donch a venta che la vertical calà dal barisenter a casca ant él perimeter d'apògg.

An figura 17 a son disegnà ses apògg e èd costi mach sinch a disegno él perimeter d'apògg. An pràtica, se j'apògg a son pì che tre, coma pr'esempi un taulin con quatr gambe, e bin rèid, an su n'apògg rèid, a l'é bin dificil che l'echilibri a sia stabili da tuti e quatru j'apògg. Tre gambe a reso él pès e la quarta a l'é nen carià. Variand la posission dèl barisenter a peulo cambié le tre gambe solecità.

An efét, da na mira analítica, as treuva che se j'apògg a son tre as peul calcolé le tre reassion, mentre se j'apògg a son pì che tre a-i son nen basta equassion pér calcolé le variabij an geugh, a meno èd fé d'ipòtesi an sl'elastissità dl'apògg.

Vardoma adess un còrp su n'apògg con atrito, andova l'atrito a l'é necessari pér l'echilibri. Consideroma na scala poggià al mur e vardoma lòn che a càpita arferendse a figura 18.




Figura 18 – Echilibri con atrito

Pér anulé fòrse e moment totaj a venta che l'arzultant dle reassion a l'abia la stessa riga d'assion dl'arzultant dle reassion. Le doe reassion a venta che a l'abio righe d'assion che as ancontro sla riga d'assion dl'arzultant dle fòrse aplicà. A venta peui che le doe reassion a sio ant él rispetiv còno d'atrito.

La prima part èd figura a mostra ij doi còno d'atrito dij doi apògg e la part ABCD che a l'han an comun. Le condission sì dzora a son verificà se e mach se la riga d'assion dl'arzultant \mathbf{P} a l'ha èd pont an comun con la part an comun dij doi còni d'atrito. As vödd èdcò che se la scala a stà nen chila midema andrinta a un dij doi còno d'atrito, a-i son èd posission pér él pès an sla scala andova l'echilibri a-i é nen. An figura, se él pès a l'é an ponta, pì davzin al mur dèl pont B, la scala a sghija.

Ant la sonda part èd figura a-i é na scala, longa h e con pès \mathbf{P} , che i suponoma a metà dla scala. Consideroma che ij doi pont d'apògg O_1 e O_2 a l'abio l'istess coeficent d'atrito f , e che l'àngol α fra scala e paviment a sia col minim prima che la scala a sghija.

Provoma a scrive le equassion dl'echilibri dë sto sistema, tnisend cont che la reassion al pont O_1 a l'é \mathbf{V}_1 con component V_{1x} e V_{1y} , e che la reassion al pont O_2 a l'é \mathbf{V}_2 con component V_{2x} e V_{2y} . La condission che l'àngol a sia él minim a përmëtt èd savèj coma as èscompon-o le reassion, dal moment che i podoma scrive: $V_{1x} = -f \cdot V_{1y}$; $V_{2x} = f \cdot V_{2y}$. Donca:

$$\sum_i F_x = V_{1x} + V_{2x} = 0$$

$$\sum_i F_y = V_{1y} + V_{2y} - P = 0$$

La component dël moment che a anteressa a l'é cola normal al disegn:

$$M_z = \sum_i (x_i \cdot \Phi_{iy} - y_i \cdot \Phi_{ix}) = 0$$

andova con Φ i l'oma indicà tant le fòrse aplicà coma le reassion
arcordand le relassion tra component dle reassion:

$$\sum_i F_x = -f \cdot V_{1y} + V_{2x} = 0$$

$$\sum_i F_y = V_{1y} + f \cdot V_{2x} - P = 0$$

$$M_z = V_{1y} \cdot h \cdot \cos(\alpha) - V_{2x} \cdot h \cdot \sin(\alpha) = 0 - P \cdot \frac{h}{2} \cdot \cos(\alpha) = 0$$

An costa manera as peulo stabilì quale ch'a son le reassion cand α a l'é al limit e l'àngol α midem. As treuva:

$$V_{1x} = -\frac{f \cdot P}{1+f^2} ; \quad V_{1y} = \frac{P}{1+f^2} ; \quad V_{2y} = \frac{f \cdot P}{1+f^2} ; \quad V_{2y} = \frac{f^2 \cdot P}{1+f^2} ; \quad \tan(\alpha) = \frac{1-f^2}{2 \cdot f}$$

Echilibri ant un sistema nen rèid

I foma giusta n'esempli èd problema andova la posission dle masse anteressà a l'echilibri a l'é nen ressiprocament costanta.

La figura 19 a mostra un bilansié che a peul bautié an sl'apògg. Un brass a l'ha na massa fissa an ponta con pèis F_2 , l'àutr a l'ha na massa èd pèis F_1 che a peul score sensa atrito e a l'é tnùa da na mòla con carteristiche conossùe.




Figura 19 – Echilibri d'un sistema nen rèid

I dàit dël problema a son che: Le aste dël bilansié a l'han massa che a peul esse trascurà. La massa a snistra a peul score sensa atrito, la mòla, an posission èd partensa, a l'é dëscarià (a aplica gnun-e fòrse). Pér dëscrive lë slongament èd la mòla dovroma la manera $\Delta h = k \cdot F$ che i suponoma a vada bin. L'àngol fàit da le aste a val α e ij doi àngoj β_1 e β_2 , an partensa, a son istess (bilansiè “orisontal”). Lassand liber el bilansiè an coste condission, i sercoma el pont d'echilibri. Sempe arferendse a la figura, i dàit numérich a son:

$$F_1 = 20 \text{ [N]} ; \quad F_2 = 8 \text{ [N]} ; \quad k = 0,5 \text{ [cm/N]}$$

$$d = 30 \text{ [cm]} ; \quad a = b = 5 \text{ [cm]} ; \quad h = 10 \div 30 \text{ [cm]} \text{ (da min a max)}.$$

$\alpha = 3\pi/4$; $\beta_1 = \beta_2 = \pi/8$ (an partensa).

Lòn che an anteressa a l'é se a esist, e an che posission, n'ugualiansa tra ij mòduj dij moment dij doi brass, che a ven-o calcolà rispét al pont d'apògg. Ant ògni posission la mòla a ven carià da na dàita fòrsa, che a pròvoca nè slongament e donca na variassion èd posission dla fòrsa F_1 an sl'asta. Èl moment dë sta fòrsa as opon al moment dàit da l'àutra asta, èl brass dla fòrsa F_2 a l'é fonsion dla posission dël bilansié. I calcoloma ij moment coma ($Fòrsa \times brass$) e donca positiv an sens orari.

An partensa :

$$\beta_1 = \beta_2 = \frac{\pi}{8} = 22,5^\circ \quad ; \quad M_2 = F_2 \cdot d \cdot \sin\left(\frac{\pi}{2} + \beta_1\right) = 221,731 \quad [N \cdot cm]$$

La fòrsa che a tira la mòla a l'é : $F_{1T} = F_1 \cdot \sin(\beta_2) = 7,653 \quad [N]$

$$x = h + a + b = 10 + 5 + 5 + \Delta h = 20 + k \cdot F_{1T} = 23.872 \quad [cm]$$

$$M_1 = -F_1 \cdot x \cdot \sin\left(\frac{\pi}{2} + \beta_2\right) = -440,266 \quad [N \cdot cm] \quad ; \quad M_{tot} = M_1 + M_2 = -218,535 \quad [N \cdot cm]$$

An coste condission èl bilansié a vira an sens antiorari. Sòn a fà chérse la fòrsa che a tira la mòla e a slontan-a èl pëis, ma la rotassion a fà scursé èl brass dla fòrsa F_1 .

Pér l'echilibri a venta che a sia :

$$M_1 + M_2 = 0 \quad ; \quad M_1 = -M_2$$

$$\text{notoma che } \beta_1 = \frac{\pi}{4} - \beta_2 \quad \text{e che } x = 20 + k \cdot F_{1T} = 20 + \frac{20 \cdot \sin(\beta_2)}{2}$$

$$240 \cdot \sin\left(\frac{3 \cdot \pi}{4} - \beta_2\right) = 20 \cdot \left(20 + \frac{20 \cdot \sin(\beta_2)}{2}\right) \cdot \sin\left(\frac{\pi}{2} + \beta_2\right) \rightarrow \text{condission d'echilibri}$$

L'equassion sì dzora a përmëtt èd trové β_2 . Anvece èd fé calcoj e passagi i l'oma fai arzolve l'equassion dal calcolator. An fonsion èd β_2 i l'oma calcolà $-M_1$ e M_2 e i l'oma fàit ij grafich, sercand èl pont andova a son uguaj. I l'oma trovà $\beta_2 = 68^\circ$. coma a mostra figura 20.




Figura 20 – Echilibri d'un sistema nen rèid

Fil solecità da na fòrsa continua

Is arferima a figura 21, andova a l'é arpresentà un fil nen estendìbil ma d'autut flessìbil, che a sia solecità ai sò estrem da doe fòrse F_1 e F_2 , e ant ij pond arlong soa longhëssa da na fòrsa che a càmbia con continuità con la posission. Cand èl fil a l'é an echilibri a dëscriv na "curva funicular".




Figura 21 - Curva funicular

El fil a l'é solecità a l'estrem O_1 da la fòrsa \mathbf{F}_1 e a l'estrem O_2 da la fòrsa \mathbf{F}_2 . I consideroma un pont P qualonque dël fil e i ciamoma con s la longhëssa dl'arch èd curva da O_1 che i pijoma com origin, fin-a a P . I podoma donca consideré $P = P(s)$. I consideroma peui n'increment infinitésim ds èd nòstr arch s che an pòrta da $P(s)$ a $P'(s + ds)$.

Se \mathbf{F} a l'é la fòrsa pér unità d'longhëssa che a agiss an sèl fil (a pordia esse sò pès) antlora an sl'element ds a-i sarà na fòrsa $\mathbf{F} \cdot ds$. Sta fòrsa, rispét a un senter èd ridussion O qualonque a l'avrà un moment $(P - O) \wedge \vec{F} \cdot ds$.

Integrand an sla curva da O_1 fin-a a P , i l'avroma l'arzultant \mathbf{A}_P e 'l moment arzultant \mathbf{M}_P an sèl tràit $O_1 P$, vis-a-dì $\bar{\mathbf{A}}_P = \int_0^s \vec{F} ds$; $\bar{\mathbf{M}}_P = \int_0^s (R - O) \wedge \vec{F} ds$ andova R a l'é 'l pont variàbil (che a corispond a l'arch s) d'integrassion. An sèl pont P a agiss èdcò l'assion dël tràit da P a O_2 e costa assion, che a l'é nen conossùa adéss, i la ciamoma Φ .

Antlora l'adission vетorial èd tute le fòrse che a agisso an sèl tràit $O_1 P$ a l'é: $\vec{F}_1 + \int_0^s \vec{F} ds + \vec{\Phi}$ e 'l moment rispét a O èd coste a l'é: $(O_1 - O) \wedge \vec{F}_1 + \int_0^s (R - O) \wedge \vec{F} ds + (P - O) \wedge \vec{\Phi}$, e a venta noté

che la fòrsa Φ a dipend da la posission s .

Se sta part èd fil a l'é an echilibri, antlora a venta ch'a sio verificà le condission sì sota :

$$\vec{F}_1 + \int_0^s \vec{F} ds + \vec{\Phi} = 0 \quad ; \quad (O_1 - O) \wedge \vec{F}_1 + \int_0^s (R - O) \wedge \vec{F} ds + (P - O) \wedge \vec{\Phi} = 0$$

Ste relassion a son vere pér qualonque arch s , a parte da zero fin-a a la longhëssa l dël fil. Se i derivoma rispét a s coste doe condission i otnoma, ant l'órdin:

$$\vec{F} + \frac{d \vec{\Phi}}{d s} = 0 \quad ; \quad (P - O) \wedge \vec{F} + (P - O) \wedge \frac{d \vec{\Phi}}{d s} + \frac{d P}{d s} \wedge \vec{\Phi} = 0$$

Ma l'adission dij prim doi termo dla sonda equassion a fà zero, com as deduv da la prima equassion, e donca la condission as arduv a $\frac{d P}{d s} \wedge \vec{\Phi} = 0$.

Ma i notoma che $\frac{dP}{ds}$ a l'é 'l vesor τ tangent a curva ant él pont P , e donca l'ultima

relassion an dis che l'assion Φ che 'l tràit PO_2 a esèrcita an sël tràit O_1P , a l'é tangent a la curva funicular, e a l'é na tension.

L'equassion $\bar{F} + \frac{d\bar{\Phi}}{ds} = 0$ a ven ciamà "**equassion andefinìa dl'echilibri**". Le equassion ai

lìmit ant ij pont O_1 e O_2 (vis-a-dì con $s = 0$ e $s = l$) a son : $\bar{F}_1 + \bar{\Phi}(0) = 0$; $\bar{F}_2 - \bar{\Phi}(l) = 0$.

Se adéss i consideroma na trien-a d'ass cartesian ortogonaj $Oxyz$, i notoma che ij cossen diretore dla tangent a la curva ant un pont P a son, ant l'ordin : dx/ds , dy/ds , dz/ds e che donca le component dla tension Φ a saran dàite da :

$$\Phi \frac{dx}{ds} ; \quad \Phi \frac{dy}{ds} ; \quad \Phi \frac{dz}{ds}$$

Se i proietoma l'equassion andefinìa dl'echilibri an sj'ass i l'avroma (notand con F_x , F_y , F_z le component èd \mathbf{F}) :

$$\left\{ \begin{array}{l} \frac{d}{ds} \left(\Phi \frac{dx}{ds} \right) + F_x = 0 \\ \frac{d}{ds} \left(\Phi \frac{dy}{ds} \right) + F_y = 0 \\ \frac{d}{ds} \left(\Phi \frac{dz}{ds} \right) + F_z = 0 \\ \left(\frac{dx}{ds} \right)^2 + \left(\frac{dy}{ds} \right)^2 + \left(\frac{dz}{ds} \right)^2 = 1 \end{array} \right.$$

L'ùltima equassion a l'é relativa ai cossen diretore dla tangent. Coste equassion diferensiaj, ansema a lòn ch'i loma vist prima, a përmëtto 'd trové le incògnite èd nòstr problema, mentre che le costant arbitràrie d'integression a përmëtto 'd fissé le condission al contorn.

I andoma nen pì ant l'ancreus, ma i vardoma jé svilup ant n'aplicassion èd costi arzultà ant él capitol sì sota.

Caden-aria omogénia

A l'é la configurassion ch'a pija un fil grév sostnù a-i doi estrem e soget mach a la fòrsa 'd gravità. A podria esse, pr'esempi, un fil dl'àuta tension fra doi traliss, suponend che l'attach a j'islator a sio fiss. La curva, an sto cas, as ès-ciama "**caden-aria omogénia**" e (i lo dimostroma nen, ma a l'é pitòst antuitiv) a stà an sël pian vertical che a passa pér ij doi pont d'attach ai doi estrem.

La figura 22 a mostra ij dàit èd partensa, andova i consideroma 'l problema an sël pian dla curva, con l'ass x orizontal e l'ass y orientà vers l'aut. I l'oma ij doi pont estrem O_1 e O_2 con l'assissa èd O_1 pì cita che cola èd O_2 . I sernoma nen pér adéss l'origin, ma già che i-i soma i disegnama l'ass y ant la posission che i sernroma peui. Èl fil a l'é omogéni e donca sò pës pér unità 'd longhëssa a l'é costant e i lo disoma p . An costa manera la fòrsa pér unità 'd longhëssa a l'avrà component $F_x = 0$ e $F_y = -p$.

La diferensa, rispét a prima, a l'é che adéss la fòrsa che a agiss an sël fil a l'é mach cola 'd gravità, dovùa al pës dël fil midem. J'equassion pér l'echilibri a dvento :

$$\frac{d}{ds} \left(\Phi \frac{dx}{ds} \right) = 0 ; \quad \frac{d}{ds} \left(\Phi \frac{dy}{ds} \right) = p$$

Integrand na vira la prima equassion i otnoma che $\Phi \frac{dx}{ds} = \text{cost} = \Phi_0$. I l'oma ciamà parèj

la costant pérchè $\Phi \frac{dx}{ds}$ a l'é nen d'àutr che la component dla trassion normal a la diirection dla fòrsa pèis, e sta component Φ_0 a l'é costanta arlong ël fil (la curva).




Figura 22 - Caden-aria omogénia

Peui i podoma consideré che $\Phi \frac{dy}{ds}$ a peul esse scrivù coma $\Phi \frac{dx}{ds} \cdot \frac{dy}{dx} = \Phi_0 \cdot \frac{dy}{dx}$ e antlora i podoma scrive la sonda dle equassion dl'echilibri sì dzora coma:

$$\frac{d}{ds} \left(\frac{dy}{dx} \right) = \frac{p}{\Phi_0}$$

Pér arzòlve st'equassion as part da consideré che i podoma scrive $y' = dy / dx$ e che i l'oma $ds = \sqrt{dx^2 + dy^2} = \sqrt{1 + (y')^2} \cdot dx$ e che donca a arzulta $\frac{dx}{ds} = \frac{1}{\sqrt{1 + (y')^2}}$.

Con quàich passagi che sì i sautoma, e moltiplicand ij doi member pér dx , nòstra equassion dl'echilibri a dventa :

$$\frac{d y'}{\sqrt{1 + (y')^2}} = \frac{p}{\Phi_0} dx$$

che as integra fàcil rispét a y' , considerà coma na variàbil, e as treuva:

$$\ln(\sqrt{1 + (y')^2} + y') = \frac{p}{\Phi_0} x + \text{cost}$$

Adéss i podoma serne la posission dl'ass y (fin-a adéss i l'oma mach considerà soa diirection) an manera d'eliminé la costant d'integression. A basta sposté paralél st'ass e félo passé dal pont V èd mìnim dla curva andova $y' = 0$, an manera che an sto pont i l'oma $x = 0$. L'equassion a dventa:

$$\ln(\sqrt{1 + (y')^2} + y') = \frac{p}{\Phi_0} x$$

A sta mira i passoma da logaritm a nùmer e i otnoma che :

$$\sqrt{1 + (y')^2} + y' = \exp\left[\frac{p}{\Phi_0} x\right].$$

I podoma 'ncora noté che se i ciamoma $\sqrt{1 + (y')^2} = a$ e $y' = b$, e is arcormda che $(a+b)(a-b) = a^2 - b^2$, travajand su sòn i trovoma che a val èdcò :

$$\sqrt{1 + (y')^2} - y' = \exp\left[-\frac{p}{\Phi_0} x\right]$$

Combinand le doe e integrand as treuva, coma equassion dla curva :

$$y = \frac{\Phi_0}{2p} \left(\exp\left[\frac{p}{\Phi_0} x\right] + \exp\left[-\frac{p}{\Phi_0} x\right] \right) + \text{cost}$$

Ancora na vira i podoma fé la costant ugual a zero sernend na posission adata dl'ass x, an manera che 'l pont èd mìnìm V (pèr $x = 0$) a l'àbia valor $y_0 = \frac{\Phi_0}{p}$.

Pèr la tension Φ dël fil as treuva (i foma nen ij càlcoj) che a val $\Phi = p y$, e a l'ha sò mìnìm ant èl pont pì bass èd la curva, andova a val $\Phi_0 = p y_0$. A l'é natural che sòn a l'é bèra con le sernìe ch'i l'oma fait pèr j'ass (a basta nen aussé la curva pèr aumenté la tension!).

IJ TRAVAJ VIRTUAJ E 'L PRINSIPI 'D D'ALEMBERT

Costa a l'è na pàrt amportanta che a anteressa nen mach la Stàtica, coma vèddroma con l'estension che a ven fàita dal prinsipi èd d'Alembert. A l'è 'dcò un dij pont èd partensa pér la formulassion analítica dla mecanica, ma sòn i lo vèddroma dòp.

Gré 'd libertà e vincoj.

I suponoma un sistema qualunque fait da N pont materiaj. Èl sistema a ven andividoà ant ògni moment, ant un sistema d'arferiment cartesian ant l'espacci, da tre coordinà pér pont, e donca 'l sistema antregh a l'è dëscrivù da $3 \cdot N$ variàbij (ò coordinà). Coste a peulo esse tute andipendente, e antlora i disoma che èl sistema a l'ha $3 \cdot N$ gré 'd libertà.

Un sistema qualunque dont soe posission a peulo esse dëscrivùe da N variabij andipendente a l'ha N gré 'd libertà.

Se 'l sistema a l'ha 'd vincoj, costi a arduvo ij gré 'd libertà, ma a l'è mal fé a traté con ògni tipo ed vincoj. I l'oma an ògni meud vist che a-i son vincoj che a peulo esse arpresentà con n'equassion algébrica fra quaich ò tute le variabij e che a dipendo nen dal temp, e an sto cas èl problema as semplifica. An efét coste relassion a arduvo 'l nùmer dle variabij andipendente, e donca a arduvo ij gré 'd libertà. Èl problema a podrà peui esse col èd trové quale che a son le variabij andipendente, ò quale variabij a venta serne com andipendente.

Pr'esempi, un còrp rèid che a peussa esse pensà coma n'ansema 'd pont a l'ha ij vincoj che ògni cobia 'd pont a deuv manten-e costanta la distansa fra ij doi pont. An sto cas i l'oma vist che, pér tanti che a sio ij pont, le variabij andipendente a son mach le tre coordinà d'origin dla terna solidal e tre cossen diretore d'ass èd costa terna. Èl pendol compòst che i l'oma vist a l'è stait èstudià ant l'ipòtesi che a podèisa mach viré antorna a n'ass che a passava pér èl pont èd sospension, e donca con un sol gré 'd libertà, dàit da l'àngol d'ossilassion.

Un vòncol a peul esse arpresentà da n'equassion algébrica, coma pr'esempi un pont vincolà a n'autr pont fiss da n'asta rèida a venta che a manten-a la distansa d dal pont fiss e l'equassion d'el vòncol a dventa cola dla sfera con senter ant èl pont fiss e ragg d . Un vòncol dë sto tipo a l'é ciama "bilateral".

Se ant l'esempi sì dzora i butoma un fil nen estendibile ma flessibile, antlora nòstr pont a peul nen avèj distansa pì gròssa che d , ma a peul avèjla pì cita. Èl segn d'ugualiansa dla condission èd vòncol a dventa un segn èd dësugualiansa, che a peul esse \geq opura \leq , e l'vòncol, che a l'é pì nen arpresentà da n'equassion ma da na dësequassion a ven ciama "unilateral".

An general peui, an cost capitol e almanch pér adéss, i consideroma vòncoj che a l'àbio nen d'atrito.

Se 'l vòncol a l'é unilateral, as peul nen disse se e coma a arduv ij gré 'd libertà d'el sistema, pérchè sòn a dipend da la spessifika condission d'el moment (andova a peul valèj èl segn d'ugualiansa ò col èd dësugualiansa).

Spostament anfinitésim

Se un sistema èd N pont a l'è an moviment, antlora ant ògni interval èd temp infinitésim dt , un pont qualunque d'el sistema P_i a l'avrà nè spostament $dP_i = v_i dt$, con v_i che a l'è la velocità (fonsion d'el temp) d'el pont midem. Cost a l'è nè **sostament real**, che a ciama un temp dt pér capitè.

I suponoma adéss che un sistema èd N particole a sia andividoà, ant un sistema d'arferiment, dai vetor èd posission r_i d'ognidun-a dle particole (che a van da l'origin al pont).

Ant lòn ch'a ven, anvece 'd consideré nè spostament real, i an-maginoma èd podèj dé a tute le particole nè spostament anfinitésim, imaginari e instantani che i ciama δr_i e che a ciama nen un temp

dt , ma a l'é arferì a un spessifich instant. Se ij gré ‘d libertà a son N , costi spostament a peulo esse tuti andipendent l'un con l'autr. Sti spostament a son ciamà “*spostament virtuaj*”.

Ij travaj virtuaj

I suponoma d'avèj ël sòlit sistema fàit da N pont materiaj e i suponoma che, sensa che a-i sia 'd vìncoj, a sia ant na posission d'echilibri. Antlora a veul dì che tute le arzultant dle fòrse che a agisso an sij pont a son a zero, vis-a-dì : $\vec{F}_i = 0$.

Donca a sarà ‘dcò, se coste fòrse a son na fonsion continua dla posission:

$$\sum_i \vec{F}_i \times \delta \vec{r}_i = 0$$

I podoma dì che ‘l travaj δT fàit da le fòrse an cost èspostament virtual a val zero. Cost a l'è ‘l prinsipi dij travaj virtuaj che a dis:

El travaj che a ven fàit da un sistema an echilibri pér n'èspostament virtual arbitrari e anfinitésim a val zero.

Spostament “virtual” a veul dì che l'èspostament a l'è mach imaginà e nen dàit an manera fisica. A l'è na spece ‘d “sonda matemàtica”.

Se adess i suponoma che ant ël sistema a-i sia ‘d vincoj, antlora i podoma consideré le fòrse coma dividùe an fòrse aplicà $\vec{F}_i^{(a)}$ e fòrse vincolar $\vec{F}_i^{(v)}$ che a son dàite da le reassion dij vincoj. E donca i l'oma:

$$\vec{F}_i = \vec{F}_i^{(a)} + \vec{F}_i^{(v)}$$

Nòstra espression èd prima a dventa antlora:

$$[1] \quad \sum_i \vec{F}_i^{(v)} \times \delta \vec{r}_i + \sum_i \vec{F}_i^{(a)} \times \delta \vec{r}_i = 0$$

A propòsit èd reassion vincolar, as peul nen parlé ‘d travaj, dal moment che le fòrse vincolar a son nen, èd sòlit, contìnuo, ò méj, a son nen na fonsion contìnuo dla posission ant l'èspassi.

A sta mira a venta antroduve un neuva postulà:

$$[2] \quad \sum_i \vec{F}_i^{(v)} \times \delta \vec{r}_i \geq 0$$

che a sia vèra pér tuti j'èspostament $\delta \vec{r}_i$ che a sia compatibij con ij vincoj. Sòn a l'è intuitiv, se pr'esempli as considera un pont grév pogia an s'na surfassa: n'èspostament vers ël bass a l'è nen compatibil con ij vincoj mentre ant n'èspostament vers l'aut ël travaj a saria positiv, ma la fòrsa butà dal vincol, an quàich manera, a spariss. A l'é natural che costa espression a val mach pér le reassions vincolar.

Se le espressions [1] e [2] a son giuste, antlora a venta èdcò che a vala l'espression, relativa a le fòrse aplicà:

$$[3] \quad \sum_i \vec{F}_i^{(a)} \times \delta \vec{r}_i \leq 0$$

Sòn a portrìa a conclude che, pér le fòrse aplicà:

$$[4] \quad \delta T = \sum_i \vec{F}_i^{(a)} \times \delta \vec{r}_i \leq 0$$

Adess però i consideroma d'ëspostament che a sio reversibij, vis-a-dì che a peusso esse fàit tant ant un vers coma ant l'àutr. Spostament che se a esist (a l'é compatibil) $\delta \mathbf{r}_i$, antlora a esist (a l'é compatibil) èdcò – $\delta \mathbf{r}_i$. Ciamoma costi spostament $\delta' \mathbf{r}_i$.

I l'oma dit che costi spostament a son arbitrari, e donca lòn che a val pér $\delta \mathbf{r}_i$, a val èdcò pér – $\delta \mathbf{r}_i$. Donca a venta che a sia vera che:

$$[5] \quad \sum_i \vec{F}_i^{(a)} \times (-\delta \vec{r}_i) \leq 0$$

Costa expression a l'è compatibil con la [3] mach se

$$[6] \quad \sum_i \vec{F}_i^{(a)} \times \delta' \vec{r}_i = 0$$

Sòn an lassa buté 'i prinsipi dij travaj virtuaj ant la forma :

El travaj che a ven fàit da le fòrse ative un sistema, a parte da na posission d'echilibri, pér nè spostament virtual anfinitésim, reversibil e compatibil con ij vincoj, a l'è zero.

Se a-i son èd vincoj, nen tuti jë spostament a son andipendent, e donca as peul nen conclude che tute le component $\vec{F}_i^{(a)}$ dle fòrse a sio a zero.

N'àutra manera

As peul èdcò vardé la costion parèj:

La formulassion dël prinsipi dij travaj virtuaj, ant èl cas èd vincoj sensa atrito, a peul esse, an forma general, daita parèj :

Le reassion che a ven-o dai vincoj sensa atrito a son tale che 'l travaj $\delta\Lambda$ che ste reassions a fan a val zero pér ògni spostament virtual anvertibil, e a l'é positiv opura zero pér ògni spostament virtual nen anvertibil.

$$\text{Donca i l'avroma che } \delta\Lambda = \sum_i \vec{F}_i^{(v)} \times \delta P_i \geq 0$$

Se $\vec{F}_i^{(a)}$ a l'é la fòrsa ativa aplicà al pont P_i , e $\vec{F}_i^{(v)}$ la rispettiva reassion vincolar, dal moment che 'l sistema as supon an echilibri, a venta ch'a sia $\vec{F}_i^{(a)} + \vec{F}_i^{(v)} = 0$, e donca $\vec{F}_i^{(a)} = -\vec{F}_i^{(v)}$.

El travaj virtual fàit da le fòrse ative dël sistema pér dë spostament virtuaj δP_i a sarà dàit da

$$\delta T = \sum_i \vec{F}_i^{(a)} \times \delta P_i = - \sum_i \vec{F}_i^{(v)} \times \delta P_i = - \delta\Lambda$$

ma dal moment che $\delta\Lambda \geq 0$, antlora a arzulta che a venta ch'a sia $\delta T \leq 0$. As dimostra che costa a l'é condission necessaria e suficenta pér l'echilibri. An conclusion as peul disse:

Pér che un sistema quualonque, con vincoj sensa atrito, a sia an echilibri a l'é necessari e suficent che l'adission dij travaj virtuaj dle fòrse aplicà al sistema a sia zero pér spostament anvertibij e che a sia ò negativa ò zero pér spostament nen anvertibij.

Stàtica dij sistema grev.

I consideroma sempe un sistema coma coj èd prima, con la diferensa che adéss le fòrse aplicà a son dàite mach dla pëis dij pont. Pér sta tratassion i pijoma un sistema d'arferiment con l'ass z orientà vers angiù (vis-a-dì ant èl sens dl'acelerassion èd gravità). I ciamoma peui con m_i la massa dël pont ch'a fà i , e con \mathbf{g} l'acelerassion èd gravità. J'àutre notassion a son cole 'd prima.

Se i pijoma un generich pont P_i dël sistema la fòrsa F_i aplicà a P_i a l'avrà coma component $F_{xi} = 0$, $F_{yi} = 0$, $F_{zi} = m_i \cdot g$.

I suponoma peui un genérich spostament virtual dël sistema e i l'oma che pér lë spostament δP_i le component a saran δx_i , δy_i , δz_i .

Ël travaj virtual dle fòrse aplicà an sto cas a resta :

$$\delta T = \sum_i \vec{F}_i \times \delta P_i = g \cdot \sum_i m_i \cdot \delta Z_i$$

Adéss i consideroma 'l barissènter dël sistema, che i ciamoma G, dont a l'é d'anteresse, an cost problema, la coordinà z_G . Com i savoma da la geometrià dle masse, costa a val: $z_G = \frac{\sum_i m_i \cdot z_i}{m}$, andova m a l'é la massa total dël sistema.

Lë spostament virtual che a pròvoca l'increment δz_i dle z_i a pròvoca, an sël barissènter, na variassion δz_G che a val : $\delta z_G = \frac{\sum_i m_i \cdot \delta z_i}{m}$.

Ël travaj virtual dle fòrse ative a dventa, antlora, $\delta T = g m \delta z_G$. Pér che 'l sistema a sia an echilibri a venta che a sia $\delta T \leq 0$ e donca a venta ch'a sia $\delta z_G \leq 0$.

A sta mira a l'é méj ch'i accordo che i l'oma orientà nòstr ass z vers l'angù. Sòn a l'é 'l prinsipi 'd Torricelli che a dis:

La condission necessaria e suficenta pérchè un sistema grév a sia an echilibri a l'é che pér ògni spostament virtual dël sistema sò barissènter a l'òbia spostament negativ o nuj. (Pér com i l'oma orientà l'ass z "che 'l barissénter a cala nen").

Ël prinsipi 'd d'Alembert.

Fin-a adess i l'oma tratà d'echilibri stàtich, suponend che un sistema an echilibri a sia ferm, ant ël sistema d'arferiment dovrà. Ma 'l concét d'echilibri a peul esse estèis.

I pijoma adess le equassion dël moviment pér nòstr sistema èd N pont, parèj com a ven-o da lë scond prinsipi 'd Newton. Pér ògni particola i i l'oma:

$$\vec{F}_i = m_i \cdot \vec{a}_i = \frac{d}{dt} (m_i \cdot \vec{v}_i)$$

Vis-a-dì che i l'oma:

$$\vec{F}_i - \frac{d}{dt} (m_i \cdot \vec{v}_i) = 0$$

Ël termo $\frac{d}{dt} (m_i \cdot \vec{v}_i)$ a l'ha le dimension èd na fòrsa, che as peul imaginé coma se a echilibràisa la fòrsa \vec{F}_i , che a l'è la fòrsa che a agiss an sël pont i . I suponoma antlora 'l sistema antrégh èd N pont, e i suponoma èd dé nè spostament virtual anfinitésim a tut ël sistema:

$$\sum_i \left[\vec{F}_i - \frac{d}{dt} (m_i \cdot \vec{v}_i) \right] \times \delta r_i = 0$$

Adess i dividoma torna le fòrse an *aplicà e vincolar* :

$$\sum_i \vec{F}_i^{(v)} \times \delta r_i + \sum_i \left[\vec{F}_i^{(a)} - \frac{d}{dt} (m_i \cdot \vec{v}_i) \right] \times \delta r_i = 0$$

Pér nè spostament compatibil con ij vncoj i l'avroma ancora che:

$$\sum_i \vec{F}_i^{(v)} \times \delta r_i \geq 0$$

E donca a venta ancora che a sia:

$$\sum_i \left[\vec{F}_i^{(a)} - \frac{d}{dt} (m_i \cdot \vec{v}_i) \right] \times \delta r_i \leq 0$$

Coma i l'oma vist prima, se jë spostament a son èdcò anvertibij, antlora l'ùnica possibilità a l'è che a sia:

$$\sum_i \left[\vec{F}_i^{(a)} - \frac{d}{dt} (m_i \cdot \vec{v}_i) \right] \times \delta' r_i = 0$$

i podoma sempe parlé ‘d travaj pér lòn che as arferiss a le fòrse $\vec{F}_i^{(a)}$, ma nen, an manera imedià, pér ij termo $\frac{d}{dt} (m_i \cdot \vec{v}_i)$. I podoma ciamé costi termo coma “**fòrse d'inersia**” che indicoma con \vec{I}_i , e i podoma scrive, antlora:

$$\sum_i [\vec{F}_i^{(a)} + \vec{I}_i] \times \delta' r_i = 0$$

e i ciamoma “**fòrsa efetiva**” él termo $\vec{F}_i^{(a)} + \vec{I}_i$.

A l'è un pòch coma se i disèiso che pér un còrp che as bogia sota l'assion èd na fòrsa, la fòrsa midema e la soa consequensa a son an echilibri. Costa a l'è na manera pì general, e manch natural, èd pensé a l'echilibri, ma an ògni manera a l'è na forma lògica e giusta da na mira matemàtica. As peul donca enonsié él **prinsipi ‘d d'Alembert** coma:

Ant l'ëspostament virtual anfinitesim anvertibil e compatibil con ij vincoj d'ògni sistema dinamich, èl travaj ale fòrse efetive a l'è zero.

I parleroma 'ncora èd cost prinsìpi, parèj com i arpijroma quaicòs dla Stàtica, parland dël passagi da la Mecànica vetorial a la Mecànica analítica.

Pàgina lassà bianca èd propòsit